

Tunku Azizah bakal dimasyhurkan pada 29 Januari ini di Istana Abu Bakar Pekan

Tengku Ampuan Pahang baharu

PEKAN - Tengku Puan Pahang, Tunku Azizah Aminah Maimunah Iskandariah dilantik menjadi Tengku Ampuan Pahang.

Sultan Pahang, Al-Sultan Abdullah Ri'ayatuddin Al-Mustafa Billah Shah Ibni Sultan Haji Ahmad Shah Al-Musta'in Billah bertitah, perkara itu diputuskan baginda pada mesyuarat Jumaah Pangkuan Diraja Pahang yang diadakan di Pejabat Majlis Ugama Islam Dan Adat Resam Melayu Pahang (MUIP), di sini semalam.

Mesyuarat juga dimaklumkan tentang hasrat baginda melantik Tengku Panglima Besar Pahang, Tengku Hassanah Ibrahim Alam Shah menjadi Tengku Mahkota Pahang yang baharu.

"Istiadat pemasyhuran akan diadakan pada 29 Januari ini di Balairung Seri Istana Abu Bakar Pekan," titah baginda ketika berkenan menemui media selepas mempengerusikan Mesyuarat Jumaah Pangkuan Diraja Pahang.

Hadir sama, Tengku Arif Temenggong Pahang, Tengku Fahd Mu'adzam Shah Sultan Haji Ahmad Shah Al-Musta'in Billah dan Menteri Besar Pahang, Datuk Seri Wan Rosdy Wan Ismail.

Menurut baginda, gelaran Tengku Ampuan Pahang dan Tengku Mahkota

itu seelok-eloknya digunakan selepas istiadat pemasyhuran nanti.

"Tengku Hassanah akan pulang (pada 28 Januari), dan akan dimasyhurkan, kembali semula ke UK dan tamat pengajian hingga hujung tahun ini," titah baginda.

Mengenai jawatan Tengku Panglima Besar yang disandang oleh Tengku Hassanah sebelum ini, Al-Sultan Abdullah bertitah jawatan itu akan dikosongkan sementara dan baginda akan mengenal pasti calon yang sesuai nanti.

Apabila ditanya pemberita tentang harapan baginda terhadap Tengku Hassanah yang akan dimasyhurkan menjadi Tengku Mahkota Pahang nanti, baginda bertitah:

"Semua anggota keluarga dan rakyat Pahang khususnya dia (Tengku Hassanah) dapat mempamerkan satu watak yang baik dan boleh menjadi seorang pemimpin kepada rakyat negeri Pahang.

"Sama-samalah kita beri tunjuk ajar kepada orang muda ini," titah baginda.

Sultan Pahang keenam itu turut memaklumkan akan menghadiri mesyuarat khas Majlis Raja-Raja yang akan bersidang pada Khamis ini di ibu negara, yang diadakan bagi memilih Yang di-Perluan Agong yang baharu.



AL-SULTAN ABDULLAH memutuskan untuk melantik Tunku Azizah Aminah (kanan) sebagai Tengku Ampuan Pahang yang baharu.



TENGGU HASSANAH IBRAHIM